

四庫全書

集部

欽定四庫全書

集部

東坡集卷五

六

詳校官庶吉士

臣

謝恭銘

檢討

臣

何思鈞覆勘

總校官進士

臣

朱

鈐

校對官編修

臣

戴聯奎

謄錄監生

臣

汪光緒

欽定四庫全書

東坡全集卷五

宋 蘇軾 撰

詩一百三首

僧清順新作垂雲亭

江山雖有餘亭榭苦難穩登臨不得要萬象各偃蹇惜
哉垂雲軒此地得何晚天功爭向背詩眼巧增損路窮
朱欄出山破石壁狠海門浸坤軸湖尾抱雲巘葱葱城
郭麗淡淡烟村遠紛紛烏鵲去一一漁樵返雄觀快新

獲微景收昔遁道人真古人嘯咏慕嵇阮空齋卧蒲褐
芒屨每自捆天憐詩人窮乞與供詩本我詩久不作荒
澁旋鋤墾從君覓佳句咀嚼廢朝飲

五月十日與呂仲甫周郊僧惠勤惠思清順可

久惟肅義詮同泛湖遊北山

三吳雨連月湖水日夜添尋僧去無路漱漱水拍簷駕
言徂北山得與幽人無清風洗昏翳晚景分濃纖縹緲
朱樓人斜陽半疎簾臨風一揮手悵焉起遐瞻世人驚

朝市獨向溪山廬此樂得有命輕薄神所殲

會客有美堂周邠長官與數僧同泛湖往北山

湖中聞堂上歌笑聲以詩見寄因和二首時

周有服

藹藹君詩似崩雲從來不許醉紅裙不知野屐穿山翠
惟見輕橈破浪紋頗憶呼盧袁彥道難邀罵坐灌將軍
皆取其有服也晚風落日元無主不惜清涼與子分

戴酒無人過子雲掩闕畫卧客書裙歌喉不共聽珠貫

醉面何因作纈紋僧侶且陪香火社詩壇欲斂鸛鵲軍
憑君徧遶湖邊寺漲淥晴來已十分

席上代人贈別

淒音怨亂不成歌縱使重來奈老何淚眼無窮似梅雨
一番勻了一番多

天上麒麟豈混塵籠中翡翠不由身那知昨夜香閨裏
更有偷啼暗別人

蓮子擘開須見臆楸枰著盡更無期破衫却有重逢處

一飯何曾忘却時

唐道人言天目山上俯視雷雨每大雷電但聞
雲中如嬰兒聲殊不聞雷震也

已外浮名更外身區區雷電若為神山頭只作嬰兒看
無限人間失箸人

追和子由去歲試舉人洛下所寄詩五首暴雨
初晴樓上晚景

秋後風光雨後山滿城流水碧潺潺烟雲好處無多子

及取昏鴉未到閒

洛邑從來天地中
嵩高蒼翠北邙紅
風流耆舊消磨盡

只有青山對病翁

謂富公也

白汗翻漿午景前
雨餘風物便蕭然
應傾半熟鵝黃酒
照見新晴水碧天

疾雷破屋雨翻河
一掃清風未覺多
應似畫師吳道子
高堂巨壁寫降魔

客路三年不見山
上樓相對夢魂閒
明朝却踏紅塵去

羞向清伊照病顏

過廣愛寺見三學演師觀楊惠之塑寶山朱瑤

畫文殊普賢三首

寓世身如夢安閒日似年敗蒲翻覆卧破衲再三連勸
客眠風竹長齋飲石泉回頭萬事錯自笑覺師賢

妙迹苦難尋茲山見幾層亂峰螺髻出絕磴陣雲崩措
意元同畫觀空欲問僧莫交林下意終老歎何曾

朱瑤唐晚輩得法尚雄深滿寺空遺迹何人識苦心長

廊歌雨脚破壁撼鐘音成壞無窮事他年復弔今

韓子華石淙莊

絳侯百萬兵尚畏書牘背功名意不已數與危機會我
公抱絕識凜凜鎮橫潰欲收伊呂迹遠與巢由對誓言
雖未從久已斷諸內區區為懷祖頗覺義之隘此身隨
造物一葉舞澎湃田園不早定歸宿終安在彼美石淙
莊每到百事廢泉流知人意屈折作濤瀨寒光洗肝鬲
清響跨竿籟我舊門前客放言不自外園中亦何有蒼

蔚可勝計請公試回首歲晚餘蒼檜

立秋日禱雨宿靈隱寺同周徐二令

百重堆案掣身閒一葉秋聲對榻眠
牀下雪霜侵戶月枕中琴筑落堦泉
崎嶇世味嘗應遍寂寞山栖老漸便
惟有憫農心尚在起占雲漢更茫然

病中獨遊淨慈謁本長老周長官以詩見寄仍
邀遊靈隱因次韻荅之

卧聞禪老入南山淨掃清風五百間
我與世疎宜獨往

君緣詩好不容攀自知樂事年年減難得高人日日閒
欲問雲公覓心地要知何處是無還

楞嚴經云我今示汝無所還地

病中遊祖塔院

紕李黃瓜村路香烏紗白葛道衣涼閉門野寺松陰轉
歌枕風軒客夢長因病得閒殊不惡安心是藥更無方
道人不惜堦前水借與匏樽自在嘗

虎跑泉

亭亭石塔東峰上此老初來百神仰虎移泉眼趁行脚

龍作浪花供撫掌至今遊人濯濯罷卧聽空堦環玦響
故知此老如此泉莫作人間去來想

佛日山榮長老方丈五絕

陶令思歸久未成遠公不出但聞名山中只有蒼髯叟
數里蕭蕭管送迎

千株玉槲攬雲立一穗珠旒落鏡寒何處霜眉碧眼客
結為三友冷相看

東麓雲根露角牙細泉幽咽走金沙不堪土肉埋山骨

未放蒼龍浴渥注

食罷茶甌未要深清風一榻抵千金腹搖鼻息庭花落
還盡平生未足心

日射回廊午枕明水沈銷盡碧烟橫山人睡覺無人見
只有飛蚊遶鬢鳴

癸丑春分後雪

雪入春分省見稀半開桃杏不勝威應慚落地梅花識
却作漫天柳絮飛不分東君專節物故將新巧發陰機

從今造物尤難料更暖須留御臘衣

孤山二詠

并引

孤山有陳時柏二株其一為人所薪山下老人自為兒
已見其枯矣然堅悍如金石愈於未枯者僧志倅作堂
於其側名之曰柏堂堂與白公居易竹閣相連屬余作
二詩以記之

柏堂

道人手種幾生前鶴骨龍姿尚宛然雙幹一先神物化

九朝三見太平年忽驚華構依巖出乞與佳名到處傳
此柏未枯君記取灰心聊伴小乘禪

竹閣

海山兜率雨茫然古寺無人竹滿軒白鶴不留歸後語
蒼龍猶是種時孫兩叢却似蕭郎筆千畝空懷渭上村
欲把新詩問遺像病維摩詰更無言

與述古自有美堂乘月夜歸

娟娟雲月稍侵軒潋潋星河半隱山魚鑰未收清夜永

鳳簫猶在翠微間。淒風瑟縮經絃柱。香霧淒迷著髻鬟。
共喜使君能鼓樂。萬人爭看火城還。

有美堂暴雨

遊人脚底一聲雷。滿座頑雲撥不開。天外黑風吹海立。
浙東飛雨過江來。十分潑灑金樽凸。千杖敲鋌羯鼓催。
喚起謫仙泉灑面。倒傾蛟室瀉瓊瑰。

八月十五日看潮五絕

定知玉兔十分圓。已作霜風九月寒。寄語重門休上鎖。

夜潮留向月中看

萬人鼓噪囂吳儂猶似浮江老阿童欲識潮頭高幾許
越山渾在浪花中

江邊身世兩悠悠久與滄波共白頭造物亦知人易老
故教江水更西流

吳兒生長狎濤淵冒利輕生不自憐東海若知明主意

應教斥鹵變桑田

是時新有
旨禁弄潮

江神河伯兩醯雞海若東來氣吐霓安得夫差水犀手

三千强弩射潮低

吳越王嘗以弓弩射潮頭與海神戰自爾水不近城

東陽水樂亭

為東陽令王都官槩作

君不學白公引涇東注渭五斗黃泥一鍾水又不學哥
舒橫行西海頭歸來羯鼓打涼州但向空山石壁下愛
此有聲無用之清流流泉無絃石無竅强名水樂人人
笑慣見山僧已厭聽多情海月空留照洞庭不復來軒
轅至今魚龍舞鈞天聞道磬囊東入海遺聲恐在海山
間鏘然澗谷含宮徵節奏未成君獨喜不須寫入薰風

絃縱有此聲無此耳

與周長官李秀才遊徑山二君先以詩見寄次

其韻二首

少年飲紅裙酒盡推不去呼來徑山下試與洗塵霧瘦
馬惜障泥臨流不肯渡獨有汝南君從我無朝暮肯將
紅塵腳暫着白雲屨嗟我與世人何異笑百步功名一
破甌棄置何用顧更憑陶靖節往問征夫路

龍亦戀故居百年尚來去至今雨電夜殿閣風纏霧而

我棄鄉國大江忘北渡便欲此山前築室安遲暮又恐
太幽獨歲晚霜入屢同遊得李生仄足隨蹇步孔明不
自愛臨老起三顧吾歸便却掃誰踏門前路

臨安三絕

將軍樹

阿堅澤畔菰蒲節玄德牆頭羽葆桑不會世間閒草木
與人何事管興亡

錦溪

楚人休笑沐猴冠越俗徒誇翁子賢五百年間異人出
盡將錦繡裹山川

石鏡

山雞舞破半巖雲菱葉開殘野水春應笑武都山下土
枉教明月殉佳人

登玲瓏山

何年僵立兩蒼龍瘦脊盤盤尚倚空翠浪舞翻紅罷亞
白雲穿破碧玲瓏三休亭上工延月九折巖前巧貯風

脚力盡時山更好莫將有限趣無窮

宿九仙山

九仙謂左元放
許邁王謝之流

風流王謝古仙真一去空山五百春
玉室金堂餘漢士桃花流水失秦人
困眠一榻香凝帳夢遶千巖冷逼身
夜半老僧呼客起雲峰缺處湧冰輪

陌上花三首并

引

遊九仙山聞里中兒歌陌上花父老云吳越王妃每歲
春必歸臨安王以書遺妃曰陌上花開可緩緩歸矣吳

人用其語為歌含思宛轉聽之凄然而其詞鄙野為易之云

陌上花開蝴蝶飛江山猶是昔人非
遺民幾度垂垂老
遊女長歌緩緩歸

陌上山花無數開
路人爭看翠輦來
若為留得堂堂去
且更從教緩緩迴

生前富貴草頭露
身後風流陌上花
已作遲遲君去魯
猶歌緩緩妾回家

遊東西巖

即謝安
東山也

謝公含雅量世運屬艱難
况復情所鍾感慨萃中年
正賴絲與竹陶寫有餘歡
常恐兒輩覺坐令高趣闌
獨携縹緲人來上東西山
放懷事物外徙倚弄雲泉
一旦功業成管蔡復流言
慷慨桓野王哀歌和清彈
挽鬚起流涕始知使君賢
意長日月促卧病已辛酸
慟哭西州門往駕那復還
空餘行樂處古木昏蒼烟

宿海會寺

籃輿三日山中行
山中信美少曠平
下投黃泉上青冥
綫路每與猿猴爭
重樓束縛遭澗坑
兩股酸辛饑腸鳴
北度飛橋踏彭鏗
繚垣百步如古城
大鐘橫撞千指迎
高堂延客夜不扃
杉槽漆斛江河傾
本來無垢洗更輕
倒牀鼻息四隣驚
紈如五鼓天未明
木魚呼粥亮且清
不聞人聲聞屢聲

海會寺清心堂

南郭子綦初喪我
西來達磨尚求心
此堂不說有清濁

遊客自觀隨淺深兩歲頻為山水役一溪長照雪霜侵
紛紛無補竟何事慚愧高人閉戶吟

徑山道中次韻荅周長官兼贈蘇寺丞

年來戰紛華漸覺夫子勝欲求五畝宅灑掃樂清淨學
道恨日淺問禪慚聽瑩聊為山水行遂此麋鹿性獨遊
吾未果覓伴誰復聽吾宗古遺直窮達付前定醑糟醉
方熟灑面呼不醒奈何效燕蝠屢欲爭晨暝不如從我
遊高論發犀柄溪南渡橫木山寺稱小徑

太平寺俗號小徑山幽

尋自茲始歸路微月暎南望功臣山雲外盤飛磴三更
渡錦水再宿留石鏡緬懷周與李能作洛生詠明朝二
子至詩律嚴號令靈輿置紙筆得句輕千乘玲瓏苦奇
秀名實巧相稱九仙更幽絕笑語千山應空巖側破甕
飛溜灑浮磬山前見虎跡候吏饒鼓競我生本艱奇塵
土滿釜甌山禽與野獸知我久蹭蹬笑謂候吏還禦虎
吾有命徑山雖云遠行李稍可併頗訝王子猷忽起山
陰興但報菊花開吾當理歸榜

汪覃秀才久留山中以詩見寄次其韻

季子應嗔不下機
棄家來伴碧雲師
中秋冷坐無因醉
半月長齋未肯辭
擲簡搖毫無忤色
汪善書託寫衆人詩
投名入社有新詩
飛騰桂籍他年事
莫忘山中採藥時

再遊徑山

老人登山汗如濯
到山困卧呼不覺
覺來五鼓日三竿
始信孤雲天一握
古語云孤雲兩角去天一握
平生未省出艱險
兩

足慣曾行聲
确含暉亭上望東溟
凌霄峰頭挹南岳共

愛絲杉翠絲亂誰見玉芝紅玉琢白雲何事自來往明

月長圓無晦朔

山有白雲
峰明月峯

塚上雞鳴猶憶欽山前鳳舞

遠徵璞雪窻馴兔元不死煙嶺孤猿苦難捉從來白足

傲死生不怕黃巾把刀槊榻上雙痕凜然在劒頭一吹

何須角

以上皆山
中故事

嗟我昏頑晚聞道與世齟齬空多學

靈水先除眼界花清詩為洗心源濁騷人未要逃競病

禪老但喜聞剝啄此生更得幾迴來從今有暇無辭數

洞霄宮

上帝高居愍世頑，故留瓊館在凡間。青山九鎖不易到，

作者七人相對閒。

論語云：作者七人矣。今監宮凡七人。

庭下流泉翠蛟舞，

洞中飛鼠白鴉翻。長松怪石宜霜鬢，不用金丹苦駐顏。

初自徑山歸，述古召飲介亭，以病先起。

西風初作十分涼，喜見新橙透甲香。遲暮賞心驚節物，
登臨病眼怯秋光。慣眠處士雲庵裏，倦醉佳人錦瑟旁。
猶有夢迴清興在，卧聞歸路樂聲長。

明日重九，亦以病不赴。述古會再用前韻。

月入秋帷病枕涼
霜飛夜簾故衾香
可憐吹帽狂司馬
空對親春老孟光
不作雍容傾座上
翻成骯髒倚門旁
人間此會論今古
細看茱萸感歎長

九日尋臻閣梨遂泛小舟至勤師院二首

白髮長嫌歲月侵
病眸無怕酒杯深
南屏老宿閒相過
東閣郎君懶重尋
試碾露芽烹白雪
休拈霜葉嚼黃金
扁舟又截平湖去
欲訪孤山支道林

湖上青山翠作堆
蔥蔥鬱鬱氣佳哉
笙歌叢裏抽身出

雲水光中洗眼來，白足赤髭迎我笑。拒霜黃菊為誰開。

明年桑苧煎茶處，憶著衰翁首重迴。

皎然有九日與陸羽煎茶詩，羽自號

桑苧翁，余來年九日去此久矣。

九日舟中望見有美堂上魯少卿飲處，以詩戲之。

指點雲間數點紅，笙歌正擁紫髯翁。誰知愛酒龍山客，却在漁舟一葉中。

西閣珠簾卷落暉，水沈烟斷佩聲微。遙知通德淒涼甚。

擁髻無言怨未歸

遊諸佛舍一日飲釅茶七椀戲書勤師壁

示病維摩元不病在家靈運已忘家何煩魏帝一九藥
且盡盧仝七椀茶

九日湖上尋周李二君不見君亦見尋於湖上
以詩見寄明日乃次其韻

湖上野芙蓉含思愁脉脉娟然如靜女不肯傍阡陌詩
人杳未來霜艷冷難宅君行逐鷗鷺出處浩莫測葦間

聞擘音雲表已飛屐使我終日尋蓬花不忍摘人生如
朝露要作百年客喟彼終歲勞幸茲一日澤願言竟不
遂人事多乖隔悟此知有命沉憂傷魂魄

送杭州杜咸陳三掾罷官歸鄉

秋風撼撼鳴枯蓼船閣荒村夜悄悄正當逐客斷腸時
君獨歌呼醉連曉老夫平生齊得喪尚戀微官失輕矯
君今憔悴歸無食五斗未可秋毫小君言失意能幾時
月啖蝦蟇行復皎殺人無驗中不快此恨終身恐難了

徇時所得無幾何
隨手已遭憂患繞
期君正似種宿麥
忍饑待食明年麩

次韻周長官壽星院同餞魯少卿

瑠璃百頃水
仙家風靜湖
平響釣車寂
歷疎松歌晚照
伶俜寒蝶抱
秋花困眠不
覺依蒲褐歸
路相將踏桂華
更著綸巾披
鶴氅他年應
作畫圖誇

次韻述古過周長官夜飲

二更鐃鼓動諸隣
百首新詩問八珍
已遣亂蛙成兩部

更邀明月作三人雲烟湖寺家家境燈火沙河夜夜春
曷不勸公勤秉燭老來光景似奔輪

述古以詩見責屢不赴會復次前韻

我生孤癖本無隣老病年來益自珍肯對紅裙辭白酒
但愁新進笑陳人北山怨鶴休驚夜南畝巾車欲及春
多謝清詩屢推轂豨膏那解轉方輪

來詩有雲霄
滿輪之句

金門寺中見李西臺與二錢

惟演
易

唱和四絕句

戲用其韻跋之

帝城春日帽簷斜，二陸初來尚憶家。
未肯將鹽下尊菜，已應知雪似楊花。

生平賀老慣乘舟，騎馬風前怕打頭。
欲問君王乞符竹，

但憂無蟹有監州。

皆世所傳
錢氏故事

西臺妙迹繼楊風，

凝式

無限龍蛇洛寺中。一紙清詩弔興

廢，塵埃零落梵王宮。

五季文章墮劫灰，升平格力未全回。
故知前輩宗徐庾，數首風流似玉臺。

胡穆秀才遺古銅器似鼎而小上有兩柱可以覆而不蹶以為鼎則不足疑其飲器也胡有

詩答之

隻耳獸齧環長唇鵝擘喙三趾下銳春蒲短兩柱高張
秋菌細君看翻覆俯仰間覆成三角翻兩髻古書雖滿
腹苟有用我亦隨世嗟君一見呼作鼎纔注升合已漂
逝不如學鷗夷盡日盛酒真良計

古有篆五
字不可識

賀陳述古弟章生子

鬱葱佳氣夜充閭始見徐卿第二雛甚欲去為湯餅客
惟愁錯寫弄麈書參軍新婦賢相敵阿大中郎喜有餘
我亦從來識英物試教啼看定何如

贈治易僧智周

寒窓孤坐凍生瓶尚把遺編照露螢閣東九師新得妙

夢吞三畫舊通靈斷絃挂壁知音喪

師與契嵩深相知時已逝矣

揮

塵空山亂石聽齋罷何須更臨水胸中自有洗心經

張子野年八十五尚聞買妾述古今作詩

錦里先生自笑狂莫欺九尺鬚眉蒼詩人老去鷺鷥在
公子歸來燕燕忙柱下相君猶有齒江南刺史已無腸
平生謬作安昌客略遣彭宣到後堂

書雙竹湛師房

我本江湖一釣舟意嫌高屋冷飈飈美師此室纔方丈
一炷清香盡日留

暮鼓朝鐘自擊撞閉門孤枕對殘缸白灰旋撥通紅火
卧聽蕭蕭雪打窓

寶山新開徑

藤梢橘刺元無路
竹杖縶鞋不用扶
風自遠來聞笑語
水分流處見江湖
回觀佛骨青螺髻
踏遍仙人碧玉壺
野客歸時山月上
棠梨葉戰暝禽呼

和述古冬日牡丹

一朵妖紅翠欲流
春光回照雪霜羞
化工只欲呈新巧
不放閒花得少休

花開時節雨連風
却向霜餘染爛紅
漏泄春光私一物

此心未信出天工

當時只道鶴林仙能遣秋花發杜鵑誰信詩能迴造化
直教霜枿放春妍

不分清霜入小園故將詩律變寒暄使君欲見藍關詠
更倩韓郎為染根

和錢安道寄惠建茶

我官于南今幾時嘗盡溪茶與山茗胸中似記故人面
口不能言心自省為君細說我未暇試評其略差可聽

建溪所產雖不同一一天與君子性森然可愛不可慢
骨清肉膩和且正雪花雨脚何足道啜過始知真味永
縱復苦硬終可錄汲黯少戇寬饒猛草茶無賴空有名
高者妖邪次頑曠體輕雖復強浮泛性滯偏工嘔酸冷
其間絕品豈不佳張禹縱賢非骨鯁葵花玉韉不易致
道路幽嶮隔雲嶺誰知使者來自西開緘磊落收百餅
嗅香嚼味本非別透紙自覺光炯炯糝團鳳友小龍
奴隸日注臣雙井收藏愛惜待佳客不敢包裹鑽權倖

此詩有味君勿傳空使時人怒生瘳

和柳子玉喜雪次韻仍呈述古

詩翁愛酒長如渴瓶盡欲沽囊已竭燈青火冷不成眠
一夜撚鬚吟喜雪詩成就我覓歡處我窮正與君髣髴
曷不走投陳孟公有酒醉君仍飽德瓊瑤欲盡天應惜
更遣清光續殘月安得佳人擢素手笑捧玉盃兩奇絕
豔歌一曲迴陽春坐使高堂生暖熱

弔天竺海月辯師三首

欲尋遺跡強沾裳
本自無生可得亡
今夜生公講堂月
滿庭依舊冷如霜

生死猶如臂屈伸
情鍾我輩一酸辛
樂天不是蓬萊客
憑仗西方作主人

欲訪浮雲起滅因
無緣却見夢中身
安心好住王文度
此理何須更問人

李頎秀才善畫山以兩軸見寄仍有詩次韻答之

平生自是箇中人欲向漁舟便寫真詩句對君難出手
雲泉勸我早抽身年來白髮驚秋速長恐青山與世新
從此北歸休悵望囊中收得武林春

雪後至臨平與柳子玉同至僧舍見陳尉列

落帆古戍下積雪高如丘強邀詩老出踈髯散颼颼僧
房有宿火手足漸和柔靜士素寡言相對自忘憂銅鑪
擢烟礎石鼎浮霜漚我行雖有程坐穩且復留大哉天
地間此生得浮遊

夜至永樂文長老院文時卧病退院

愁聞巴叟卧荒村來打三更月下門往事過年如昨日
此生未死得重論老非懷土情相得病不開堂道益尊
惟有孤栖舊時鶴舉頭見客似長言

柳氏二外甥求筆迹

退筆成山未足珍讀書萬卷始通神君家自有元和脚
莫厭家雞更問人

一紙行書兩絕詩遂良鬚鬢已如絲何當火急傳家法

欲見誠懸筆諫時

錢安道席上令歌者道服

烏府先生鐵作肝
霜風卷地不知寒
猶嫌白髮年前少
故點紅燈雪裏看
他日卜隣先有約
待君投綬我休官
如今且作華陽服
醉唱儂家七返丹

除夜野宿常州城外二首

行歌野哭兩堪悲
遠火低星漸向微
病眼不眠非守歲
鄉音無伴苦思歸
重衾腳冷知霜重
新沐頭輕感髮稀

多謝殘燈不嫌客孤舟一夜許相依

南來三見歲云徂直恐終身走道塗老去怕看新曆日
退歸擬學舊桃符烟花已作青春意霜雪偏尋病客鬚
但把窮愁博長健不辭醉後飲屠酥

元日過丹陽明日立春寄魯元翰

堆盤紅縷細茵蔯巧與椒花兩鬪新竹馬異時寧信老
土牛明日莫辭春西湖弄水猶應早北寺觀燈欲及辰
白髮蒼顏誰肯記曉來頻嚏為何人

古纏頭曲

鷗絃鐵撥世無有樂府舊工惟尚叟一生喙硬眼無人
坐此困窮今白首翠鬟女子年十七指法已似呼韓婦
輕帆渡海風掣迴滿面沙塵和淚垢青衫不逢湓浦客
紅袖漫插曹綱手爾來一見哀駘佗便著臂鞬躬井臼
我慚貧病百不足強對黃花飲白酒轉關護索動有神
雷輶空堂戰窓牖四絃一抹擁袂立再拜十分為我壽
世人只解錦纏頭與汝作詩傳不朽

刁同年草堂

不用長竿矯繡衣南園北第兩參差青山有約長當戶
流水無情自入池歲久醅醺渾欲合春來楊柳不勝垂
主人不用怨怨去正是紅梅著子時

惠山謁錢道人烹小龍團登絕頂望太湖

踏遍江南南岸山逢山未免更留連獨携天上小團月
來試人間第二泉石路縈回九龍脊水光翻動五湖天
孫登無語空歸去半嶺松聲萬壑傳

錢道人有詩云直須認取主人翁作兩絕戲之
首斷故應無斷者冰消那復有冰知主人苦苦令儂認
認主人人竟是誰

有主還須更有賓不如無鏡自無塵只從半夜安心後
失却當年覺痛人

和蘇州太守王規甫侍太夫人觀燈之什余時
以劉道原見訪滯留京口不及赴此會二首
不覺朱轡輾後塵爭看繡幃錦纏輪洛濱侍從三人貴

京兆平反一笑春但逐東山携妓女那知後閣走窮賓
滯留不見榮華事空作賡詩第七人

翻翻緹騎走香塵激激飛濤射火輪美酒留連三夜月

豐年傾倒五州春

時浙西皆以不熟
罷燈惟蘇獨盛

安排詩律追強對

蹭蹬歸期為惡賓墮珥遺簪想無限華胥猶見夢回人

成都進士杜暹伯升出家名法通往來吳中

欲識當年杜伯升飄然雲水一孤僧若教俯首隨韉鎖

料得如今似我能

柳子玉云通若
及第不過似我

東坡全集卷五

欽定四庫全書

東坡全集卷六

宋 蘇軾 撰

詩九十九首

虎丘寺

入門無平田石路穿細嶺陰風生澗壑古木翳潭井湛
盧誰復見秋水光耿耿鐵花秀巖壁殺氣噤蛙黷幽幽
生公堂左右立頑礪當年或未信異類服精猛胡為百
歲後仙鬼互馳騁窈然留新詩讀者為悲哽東軒有佳

致雲水麗千頃熙熙覽生物春意破淒冷我來屬無事
暖日相與永喜鵲翻初旦愁鴛躑落景坐見漁樵還新
月溪上影悟彼良自怡歸田行可請

常潤道中有懷錢塘寄述古五首

從來直道不辜身得向西湖兩過春沂上已成曾點服
泮宮初采魯侯芹休驚歲歲年年貌且對朝朝莫莫人
細雨晴時一百六畫船鼙鼓莫違民

草長江南鶯亂飛年來事事與心違花開後院還空落

燕入華堂怪未歸世上功名何日是
罇前點檢幾人非

去年柳絮飛時節記得金籠放雪衣

抗人以放鴿為太守壽

浮玉山頭日日風

即金山也

湧金門外已春融二年魚鳥渾

相識三月鶯花付與公
剩看新翻眉倒暈未應泣別臉
消紅何人織得相思字寄與江邊北向鴻

國豔天饒酒半酣去年同賞寄僧簷
但知撲撲晴香軟誰見森森曉態嚴
穀雨共驚無幾日蜜蜂未許輒先甜
應須火急回征棹一片辭枝可得黏

惠山泉下土如濡陽羨溪頭米勝珠賣劍買牛吾欲老
殺雞為黍子來無地偏不信容高蓋俗儉真堪著腐儒
莫怪江南苦留滯經營身計一生迂

刁景純賞瑞香花憶先朝侍宴次韻

上苑天桃自作行劉郎去後幾回芳厭從年少追新賞
閒對宮花識舊香欲贈佳人非泛洧好紉幽佩弔沉湘
鶴林神女無消息為問何年返帝鄉

同柳子玉遊鶴林招隱醉歸呈景純

花時臘酒照人光歸路春風灑面涼劉氏宅邊霜竹老
戴公山下野桃香巖頭足練無天靜泉底真珠濺客忙
安得道人携笛去一聲吹裂翠崖岡

景純見和復次韻贈之二首

解組歸來道益光坐看百物自炎涼卷簾堂上檀槽鬧
送客林間檠燭香淺量已愁當酒怯非才尤覺和詩忙
何人貪佩黃金印千柱耽耽鎖北岡

人間膏火正爭光每到藏春得暫涼多事始知田舍好

凶年偏覺野蔬香
溪山勝畫徒能說
來往如梭為底忙
老去此身無處著
為翁栽插萬松岡

柳子玉亦見和因以送之兼寄其兄子璋道人
不羨腰金照地光
暫時假面弄西涼
晴窓燕日肝腸暖
古殿朝真屨袖香
說靜故知猶有動
無閒底處更求忙
先生官罷乘風去
何用區區賦陟岡

子玉家宴用前韻見寄復荅之

自酌金樽勸孟光
更教長笛奏伊涼

子玉家有笛妓

牽衣男女

遶太白扇枕郎君煩阿香詩病逢春轉深痼愁魔得酒
暫奔忙醒時情味吾能說日在西南白草岡

景純復以二篇一言其亡兄與伯父同年之契
一言今者唱酬之意仍次其韻

靈壽扶來似孔光感時懷舊一悲涼蟾枝不獨同攀桂
雞舌還應共賜香

亦同為郎

等是浮休無得喪龕分憂樂有

閒忙年來世事如波浪鬱鬱誰知柏在岡

屢把鉛刀齒步光更遭華袞照厖涼蘇門山上莫長嘯

蒼苔林中無別香燭燼已殘中夜刻槐花還似昔年忙
背城借一吾何敢慎莫樽前替戾岡

金山寺與柳子玉飲大醉卧寶覺禪榻夜分方
醒書其壁

惡酒如惡人相攻劇刀箭頽然一榻上勝之以不戰詩
翁氣雄拔禪老語清軟我醉都不知但覺紅綠眩醒時
江月墮撼撼風響變惟有一龕燈二豪俱不見

大風留金山兩日

塔上一鈴獨自語明日顛風當斷渡朝來白浪打蒼崖
倒射軒窓作飛雨龍驤萬斛不敢過漁艇一葉從掀舞
細思城市有底忙却笑蛟龍為誰怒無事久留童僕怪
此風聊得妻孥忤滯山道人獨何事半夜不眠聽粥鼓
監洞霄宮俞康直郎中所居四詠

退圃

百丈休牽上瀨船一鉤歸釣縮頭鰕園中草木春無數

只有黃楊厄閏年

俗說黃楊歲長一寸過閏退三寸

逸堂

新第誰來作並隣舊官寧復憶星辰
請君置酒吾當賀知向江湖拜散人

遯軒

冠蓋相望起隱淪先生那得老江村
古來真遯何曾遯笑殺逾垣與閉門

遠樓

西山烟雨卷疎簾北戶星河落短簷
不獨江天解空濶

地偏心遠似陶潛

遊鶴林招隱二首

郊原雨初霽春物有餘妍古寺滿修竹深林聞杜鵑睡
餘柳花墮目眩山櫻然西窓有病客危坐看香煙

行歌白雲嶺坐咏修竹林風輕花自落日薄山半陰澗
草誰復識聞香杳難尋時見城市人幽居惜未深

書普慈長老壁

志誠

普慈寺後千竿竹醉裏曾看碧玉椽倦客再遊行老矣

高僧一笑故依然久參白足知禪味苦厭黃公鳥名聒晝
眠惟有兩株紅杏葉晚來猶得向人妍

書焦山綸長老壁

法師住焦山而實未嘗住我來輒問法法師了無語法
師非無語不知所答故君看頭與足本自安冠屨譬如
長鬕人不以長為苦一旦或人問每睡安所措歸來被
上下一夜着無處展轉遂達晨意欲盡鑷去此言雖鄙
淺故自有深趣持此問法師法師一笑許

刁景純席上和謝生二首

悞入仙人碧玉壺一歡那復間親踈
杯盤狼藉吾何敢
車騎雍容子甚都
此夜新聲聞北里
他年故事紀南徐
欲窮風月三千界
願化人天百億軀

縱飲誰能問挈壺
不知門外曉星踈
綺羅勝事齊三閣
賓主談鋒敵兩都
榻畔烟花常數杜
海中童艸尚追徐
母多酌我公須聽
醉後麤狂膽滿軀

留別金山寶覺圓通二長老

沐罷巾冠快晚涼
睡餘齒頰帶茶香
艤舟北岸何時渡
晞髮東軒未肯忙
康濟此身殊有道
醫治外物本無方
風流二老長還往
顧我歸期尚渺茫

無錫道中賦水車

翻翻聯聯銜尾鴉
聲聲確確蛻骨蛇
分畦翠浪走雲陣
刺水綠鍼抽稻芽
洞庭五月欲飛沙
鼃鳴窟中如打衙
天公不見老農泣
喚取阿香推雷車

杭州牡丹開時僕猶在常潤周令作詩見寄次

其韻復次一首送赴闕

羞歸應為負花期已是成陰結子時與物寡情憐我老
遣春無恨賴君詩玉臺不見朝酣酒金縷猶歌空折枝
從此年年定相見欲師老圃問樊遲

莫負黃花九日期人生窮達可無時十年且就三都賦
萬戶終輕千首詩天靜傷鴻猶戢翼月明驚鵲未安枝
君看六月河無水萬斛龍驤到自遲

蘇州閭丘江君二家雨中飲酒二首

小園陰陰遍灑塵方塘潏潏欲生紋已煩仙袂來行雨
莫遣歌聲便駐雲肯對綺羅辭白酒試將文字惱紅裙
今宵記取醒時節點滴空階獨自聞

五紀歸來鬢未霜十眉環列坐生光喚船渡口迎秋女
駐馬橋邊問泰娘曾把四絃娛白傅敢將百草鬪吳王
從今却笑風流守畫戟空凝宴寢香

次韻沈長官三首

家山何在兩忘歸杯酒相逢慎勿違不獨飯山嘲我瘦

也應糠覈怪君肥

男婚已畢女將歸
累盡身輕志莫違
誰道山中食無肉
玉池清水自生肥

造物知吾久念歸
似憐衰病不相違
風來震澤帆初飽
雨入松江水漸肥

戲書吳江三賢畫像三首

誰將射御教吳兒
長笑申公為夏姬
却遣姑蘇有麋鹿
更憐夫子得西施

范蠡

浮世功勞食與眠季鷹真得水中仙不須更說知機早

直為鱸魚也自賢

張翰

千首文章二頃田囊中未有一錢看却因養得能言鴨

驚破王孫金彈丸

陸龜蒙

和劉孝叔會虎丘時王規甫齋素祈雨不至二

首

白簡威猶凜青山興已穠鶴閒雲作氎駝卧草埋峰跪
履若可教卜隣應見容因公問回老何處定相逢

太常齋未解不肯對纖穠只遣三千履來遊十二峰林
空谷清唱潭淨寫衰容歸去瑤臺路還應月下逢

過永樂文長老已卒

初驚鶴瘦不可識旋覺雲歸無處尋三過門間老病死
一彈指頃去來今存亡慣見渾無淚鄉井難忘尚有心
欲向錢塘訪圓澤葛洪川畔待秋深

贈張刁二老

兩邦山水未淒涼二老風流總健強共成一百七十歲

各飲三萬六千場藏春塢裏鶯花鬧仁壽橋邊日月長
惟有詩人被磨折金釵零落不成行

去年秋偶遊寶山上方入一小院闐然無人有
僧隱几低頭讀書與之語漠然不甚對問其
隣之僧曰此雲閣黎也不出十五年矣今年
六月自常潤還復至其室則死葬數月矣作
詩題其壁

雲師來寶山一住十五秋讀書常閉戶客至不舉頭去

年造其室清坐忘百憂我初無言說師亦無對酬今來
復扣門空房但颼颼云已滅無餘薪盡火不留却疑此
室中常有斯人不所遇孰非夢事過吾何求

聽僧昭素琴

至和無攫醪至平無按抑不知微妙聲究竟何從出散
我不平氣洗我不和心此心知有在尚復此微吟

僧惠勤初罷僧職

軒軒青田鶴鬱鬱在樊籠既為物所縻遂與吾輩同今

來始謝去萬事一笑空新詩如洗出不受外垢蒙清風
入齒牙出語如風松霜髭茁病骨饑坐聽午鐘非詩能
窮人窮者詩乃工此語信不妄吾聞諸醉翁

遊靈隱高峰塔

言遊高峰塔薦食治野裝火雲秋未衰及此初旦涼霧
霏巖谷暗日出草木香嘉我同來人久便雲水鄉相勸
小舉足前路高且長古松攀龍蛇怪石坐牛羊漸聞鐘
磬音飛鳥皆下翔入門空有無雲海浩茫茫惟見聾道

人老病時絕糧問年笑不答但指穴藜牀心知不復來
欲歸更傍徨贈別留足布今歲天早霜

八月十七日天竺山送桂花分贈元素

月缺霜濃細葉乾此花元屬桂堂仙鷺峰子落鷺前夜
蟾窟枝空記昔年破滅山僧憐耿介練裙溪女鬪清妍
願公採擷紉幽佩莫遣孤芳老澗邊

捕蝗至浮雲嶺山行疲苦有懷子由弟二首

西來煙陣塞空虛灑遍秋田雨不如新法清平那有此

老身窮苦自招渠無人可訴烏銜肉憶弟難憑犬寄書
自笑迂疎皆此類區區猶欲理蝗餘

霜風漸欲作重陽熠熠溪邊野菊黃久廢山行疲犂确
尚能村醉舞淋浪獨眠林下夢魂好回首人間憂患長
殺馬毀車從此逝子來何處問行藏

青牛嶺高絕處有小寺人迹罕到

暮歸走馬沙河塘爐烟裊裊十里香朝行曳杖青牛嶺
崖泉咽咽千山靜君勿笑老僧耳聾喚不聞百年俱是

可憐人明朝且復城中去白雲却在題詩處

新城陳氏園次晁補之韻

荒涼廢圃秋寂歷幽花晚山城已窮僻況與城相遠我
來亦何事徙倚望雲巘不見苦吟人清樽為誰滿

梅聖俞詩集中有毛長官者今於潛令國華也
聖俞沒十五年而君猶為令捕蝗至其邑作
詩戲之

詩翁憔悴老一官厭見首蕭堆青盤歸來羞澁對妻子

自比鮎魚緣竹竿今君滯留生二毛飽聽衙鼓眠黃紬
更將嘲笑調朋友人道獼猴騎土牛願君恰似高常侍
暫為小邑仍刺史不願君為孟浩然却遭明主放還山
宦遊逢此歲年惡飛蝗來時半天黑羨君封境稻如雲
蝗自識人人不識

與毛令方尉遊西菩提寺二首

推擠不去已三年魚鳥依然笑我頑人未放歸江北路
天教看盡浙西山尚書清節衣冠後處士風流水石間

一笑相逢那易得數詩狂語不須刪

路轉山腰足未移水清石瘦便能奇白雲自占東西嶺
明月誰分上下池黑黍黃粱初熟後朱柑綠橘半甜時
人生此樂須天賦莫遣兒曹取次知

聽賢師琴

大絃春溫和且平小絃廉折亮以清平生未識宮與角
但聞牛鳴盎中雉登木門前剝啄誰扣門山僧未聞君
勿瞋歸家且覓千斛水淨洗從前箏笛耳

贈寫真何克秀才

君不見潞州別駕眼如電左手挂弓橫撚箭又不見雪中騎驢孟浩然皺眉吟詩肩聳山饑寒富貴兩安在空有遺像留人間此身常擬同外物浮雲變化無蹤迹問君何苦寫我真君言好之聊自適黃冠野服山家容意欲置我山巖中勲名將相今何限往寫褒公與鄂公

回先生過湖州東林沈氏飲醉以石榴皮書其家東老庵之壁云西隣已富憂不足東老雖

貧樂有餘白酒釀來因好客黃金散盡為收
書西蜀和仲聞而次其韻三首東老沈氏之
老自謂也湖人因以名之其子偕作詩有可
觀者

世俗何知貧是病神仙可學道之餘但知白酒留佳客
不問黃公覓素書

符離道士晨興際華岳先生尸解餘忽見黃庭丹篆句
猶傳青紙小朱書

淒涼雨露三年後
髣髴塵埃數字餘
至用榴皮緣底事
中書君豈不中書

李行中秀才醉眠亭

已向閒中作地仙
更於酒裏得天全
從教世路風波惡
賀監偏工水底眠

君且歸休我欲眠
人言此語出天然
醉中對客眠何害
須信陶潛未若賢

孝先風味也堪憐
肯為周公晝日眠
枕麴先生猶笑汝

枉將空腹貯遺編

甘露寺彈箏

多景樓上彈神曲，欲斷哀絃再三促。
江妃出聽霧雨愁，

白浪翻空動浮玉。

金山名

喚取吾家雙鳳槽，遣作三峽孤

猿號與君合奏芳春調。啄木飛來霜樹杪，

單同年求德興俞氏聚遠樓詩三首

雲山烟水苦難親，野草幽花各自春。
賴有高樓能聚遠，

一時收拾與閒人。

無限青山散不收雲奔浪卷入簾鉤直將眼力為疆界
何啻人間萬戶侯

聞說樓居似地仙不知門外有塵寰幽人隱几寂無語
心在飛鴻滅沒間

平山堂次王居卿祠部韻

高會日陪山簡醉狂言屢發次公醒酒如人面天然白
山向吾曹分外青江上飛雲來北固檻前修竹憶南屏
六朝興廢餘丘壘空使姦雄笑寧馨

次韻陳海州書懷

鬱鬱蒼梧海上山

東海鬱洲山云
自蒼梧浮來

蓬萊方丈有無間舊

聞草木皆仙藥欲棄妻孥守市闌雅志未成空自歎故

人相對若為顏酒醒却憶兒童事長恨雙鳬去莫攀

陳曾

令鄉
邑

次韻陳海州垂槎亭

人事無涯生有涯逝將歸釣漢江槎垂桴我欲從安石
遁世誰能識子嗟日上紅波浮碧巘潮來白浪卷青沙

清談美景雙奇絕不覺歸鞍帶月華

次韻孫職方蒼梧山

蒼梧奇事豈虛傳荒怪還須問子年
遠托鼇頭轉滄海來依鵬背負青天
或云靈境歸賢者又恐神功亦偶然
聞道新春恣遊覽羨君平地作飛仙

次韻孫巨源寄漣水李盛二著作并以見寄五絕

南嶽諸劉豈易逢相望無復馬牛風
山公雖見無多子

社燕何由戀塞鴻

昔與巨源劉貢父劉莘老相遇於山陽自爾契濶惟巨源近者復相見於

京口

高才晚歲終難進勇退當年正急流不獨二疏為可慕

他時當有景孫樓

巨源近離東海郡有景疏樓

漱石先生難可意

謂巨源

齒瓊校尉久無朋

自謂

應知客路

愁無奈故遣吟詩調李陵

謂李君也

雲雨休排神女車忠州老病畏人誇詩豪正值安仁在

空看河陽滿縣花

盛為邑宰

膠西未到吾能說桑柘禾麻不見春不羨京塵騎馬客
羨他淮月弄舟人

王莽

漢家殊未識經綸入手功名事事新百尺穿成連夜井
千金購得解飛人

董卓

公業平時勸用儒諸公何事起相圖只言天下無健者
豈信車中有布乎

虎兒

舊聞老蚌生明珠未省老兔生於菟老兔自謂月中物
不騎快馬騎蟾蜍蟾蜍爬沙不肯行坐令青衫垂白鬚
於菟駿猛不類渠指揮黃熊駕黑羆丹砂紫麝不用塗
眼光百步走妖狐妖狐莫誇智有餘不勞搖牙咀爾徒
除夜病中贈段屯田

龍鍾三十九勞生已強半歲暮日斜時還為昔人歎

樂天

詩云行年三十
九歲暮日斜時

今年一線在那復堪把玩欲起強持酒

故交雲雨散惟有病相尋空齋為老伴蕭條燈火冷寒
夜何時旦勸僕觸屏風饑饉嗅空案數朝閉閣卧霜髮
秋蓬亂傳聞使者來策杖就梳盥書來苦安慰不怪造
請緩大夫忠烈後高義金石貫要當擊權豪未肯覩衰
懦此生何所似閨盡灰中炭歸田計已決此邦聊假館
三徑簷成貲一枝有餘煖願君留信宿庶奉一笑粲

喬太博見和復次韻荅之

百年三萬日老病常居半其間互憂樂歌笑雜悲歎顛

倒不自知直為神所玩須臾便堪笑萬事風雨散自從
識此理久謝少年伴逝將遊無何豈暇讀城旦非才更
多病二事可并案愧煩賢使者弭節整紛亂喬侯瑚璉
質清廟嘗薦盥奮髯百吏走坐變齊俗緩未遭甘鷄退
並進恥魚貫每聞議論餘凜凜激貪懦莫邪當自躍豈
復煩爐炭便應朝秣越未暮刷燕館胡為守故丘眷戀
桑榆煖為君扣牛角一咏南山采

二人再和亦再答之

寒難知將晨饑鶴知夜半亦如老病客遇節常感歎光陰等敲石過眼不容玩親友如搏沙放手還復散羈孤每自笑寂寞誰肯伴元達號神君

晉循吏喬智明字元達

高論森

月旦紀明本賢將

段釋之本將家

汨沒事堆案欣然肯相顧夜

閣燈火亂盤空愧不飽酒薄僅堪盥雍容許着帽不怪

安石緩雖無窈窕人清唱弄珠貫幸有從橫舌說劍起

慵懦二豪沉下位暗火埋濕炭豈似草玄人默默老儒

館行看富貴逼炙手借餘暖應念苦思歸登樓賦王粲

雪後書北臺壁二首

黃昏猶作雨纖纖
夜靜無風勢轉嚴
但覺衾裯如潑水
不知庭院已堆鹽
五更曉色來書幌
半夜寒聲落畫簷
試掃北臺看馬耳
未隨埋沒沒有雙尖

城頭初日始翻鴉
陌上晴泥已沒車
凍合玉樓寒起粟
光搖銀海眩生花
遺蝗入地應千尺
宿麥連雲有幾家
老病自嗟詩力退
空吟冰柱憶劉叉

謝人見和前篇二首

已分酒杯欺淺懦，敢將詩律鬪深嚴。
漁蓑句好應須畫，柳絮才高不道鹽。
敗履尚存東郭足，飛花又舞謫仙簷。
書生事業真堪笑，忍凍孤吟筆退尖。

九陌淒風戰齒牙，銀杯逐馬帶隨車。
也知不作堅牢玉，無奈能開頃刻花。
得酒強歡愁底事，閉門高卧定誰家。
臺前日暖君須愛，冰下寒魚漸可叉。

鐵溝行贈喬太博

城東坡隴何所似，風吹海濤低復起。
城中病守無所為，

走馬來尋鐵溝水鐵溝水淺不容輒恰似當年韓與侯
有魚無魚何足道駕言聊復寫我憂荒村野店亦何有
欲發狂言須斗酒山頭落日側金盆倒着接羅搔白首
忽憶從軍年少時輕裘細馬百不知臂弓腰箭南山下
追逐長楊射獵兒老去同君兩憔悴犯夜醉歸人不避
今年定起故將軍未肯先誅霸陵尉

出城送客不及步至溪上二首

送客客已去尋花花未開未能城裏去且復水邊來父

老借問我使君安在哉今年好風雪會見麥千堆

春來六十日笑口幾回開會作堂堂去何妨得得來勸

游行老矣舊隱賦歸哉東望峨眉小廬山翠作堆

郡東廬山

絕類哉
眉而小

蘇州姚氏三瑞堂

姚氏世
以孝稱

君不見董邵南隱居行義孝且慈天公亦恐無人知故
令雞狗相哺兒又令韓老為作詩爾來三百年名與淮
水東南馳此人世不乏此事亦時有楓橋三瑞皆目見

天意宛在虞鰥後惟有此詩非昔人君更往求無價手

莫笑銀杯小答喬太博

陶潛一縣令獨飲仍獨醒猶將公田二頃五十畝種秫
作酒不種秔我今號為二千石歲釀百石何以醉賓客
請君莫笑銀杯小爾來歲旱東海窄會當拂衣歸故丘
作書貸粟監河侯萬斛船中着美酒與君一生長拍浮

送段屯田分得于字

勸農使者古丈夫不惜春衫踐泥塗王事靡盬君甚劬

奉常客卿虬兩須東武縣令天馬駒泮宮先生非俗儒
相與野飲四子俱樂哉此樂城中無溪邊策杖自携壺
腰笏不煩何易于膠西病守老且迂空齋愁坐紛墨朱
四十豈不知頭顱畏人不出何其愚

和段屯田荆林館

南山有佳色無人空自奇清詩為題品草木變芬菲謝
女得秀句留待中郎歸便當勒鞭策僕勸馬亦饑

段有姪女

在密

贈上天竺辯才師

南北一山門上下兩天竺中有老法師瘦長如鸛鵒不
知修何行碧眼照山谷見之自清涼洗盡煩惱毒坐令
一都會男女禮白足我有長頭兒角頰峙犀玉四歲不
知行抱負煩背腹師來為摩頂起走趁奔鹿乃知戒律
中妙用謝羈束何必言法華佯狂啖魚肉

遊廬山次韻章傳道

塵容已似服轅駒野性猶同縱壑魚出入巖壑千仞表

較量筋力十年初雖無窈窕驅前馬還有鷗夷挂後車
莫笑吟詩淡生活當令阿買為君書

廬山五咏

廬教洞

圖經云教泰博士
避難此山遂得道

上界足官府飛昇亦何益還在此山中相逢不相識

飲酒臺

博士雅好飲空山誰與娛莫向驪山去君王不喜儒

聖燈巖

石室有金丹山神不知秘何必露光芒夜半驚童稚


三泉

皎皎巖下泉無人還自潔不用比三星清光同一月

障日峰

其狀類峨眉但小耳

長安自不遠蜀客苦思歸莫教名障日喚作小峨眉



東坡全集卷六

欽定四庫全書

集部

東坡全集卷八

詳校官庶吉士_臣謝恭銘

檢討_臣何思鈞覆勘

總校官進士_臣朱鈐

校對官編修_臣戴聯奎

謄錄監生_臣汪光緒

欽定四庫全書

東坡全集卷七

宋 蘇軾 撰

詩八十三首

次韻章傳道喜雨

禱常山而得

去年夏旱秋不雨海畔居民飲鹹苦今年春暖欲生蠓
地上戢戢多於土預憂一旦開兩翅口吻如風那肯吐
前時渡江入吳越布陣橫空如項羽

去歲錢塘見飛蝗自西北來極可畏

農夫拱手但垂泣人力區區固難禦撲緣駿尾困牛馬

啖齧衣服穿房戶坐觀不救亦何心秉畀炎火傳自古
荷鋤散掘誰敢後得米濟饑還小補常山山神信英烈
撓駕雷公訶電母應憐郡守老且愚欲把瘡癢手摩撫
山中歸時風色變中路已覺商羊舞夜窓騷騷鬧松竹
朝畦泫泫流膏乳從來蝗旱必相資此事吾聞老農語
庶將積潤掃遺孽收拾豐歲還明主縣前已窖八千斛
今春及今得蝗子八千餘斛率以一升完一畝更看蠶婦過初眠蠶一
眠則蝗不復生矣未用賀客來旁午先生筆力吾所畏蹙踏鮑

謝跨徐庾偶然談笑得佳篇便恐流傳成樂府陋邦一
雨何足道吾君盛德九州普中和樂職幾時作試向諸
生選何武

謝郡人田賀二生獻花

城裏田員外城西賀秀才不愁家四壁自有錦千堆珍
重尤奇品艱難最後開芳心困落日薄艷戰輕雷

昨日雷雨

老守仍多病壯懷先已灰慙慙此聚者

賀獻魏花三朵

攀折為

誰哉玉腕揜紅袖金樽瀉白醅何當鑷霜鬢強插滿頭

迴

惜花

吉祥寺中錦千堆

錢塘花最盛處

前年賞花真盛哉道人勸我

清明來腰鼓百面如春雷打徹涼州花自開沙河塘上

插花回醉倒不覺吳兒吟豈知如今雙鬢催城西古寺

沒蒿萊有僧閉門手自栽千枝萬葉巧翦裁就中一叢

何所似馬腦盤盛金縷杯而我食菜方清齋對花不飲

花應猜夜來雨雹如李梅紅殘綠暗吁可哀

和頤教授見寄用除夜韻

我笑陶淵明種秫二頃半婦言既不用還有責子歎無絃則無琴何必勞撫玩我笑劉伯倫醉髮蓬筍散二豪苦不納獨以鐻自伴既死何用埋此身同夜旦孰云二子賢自結兩重桉咄人還自笑出口談治亂一生溷塵垢晚以道自盥無成空得懶坐此百事緩反間頤夫子講道出新貫豈無一尺書恐不記庸懦陋邦貧且病數米銖稱炭慙愧章先生十日坐空館袖中出子詩貪讀

酒屢煖狂言各須慎勿使輸薪粢

和子由四首

韓太祝送遊太山

偶作郊原十日遊未應回首厭籠囚但教塵土驅馳足
終把雲山爛漫酬聞道逢春思濯錦便須到處覓菟裘
恨君不上東封頂夜看金輪出九幽

送春

夢裏青春可得追欲將詩句絆餘暉酒闌病客惟思睡

蜜熟黃蜂亦懶飛
芍藥櫻桃俱掃地

病過此
二物

鬢絲禪榻

雨忘機憑君借取法界觀一洗人間萬事非

來書云近
看此書余

未嘗
見也

首夏官舍即事

安石榴花開最遲絳
幕深樹出幽菲
吾廬想見無限好
客子倦遊胡不歸
座上一樽雖得滿
古來四事巧相違
令人却憶湖邊寺
垂柳陰陰晝掩扉

送李供備席上和李詩

家聲赫奕蓋并涼也解微吟錦瑟傍擘水取魚湖起浪
引杯看劍坐生光風流別後人人憶才器歸來種種長
不用更貪窮事業風騷分付與沉湘

西齋

西齋深且明中有六尺牀病夫朝睡足危坐覺日長昏
昏既非醉踽踽亦非狂褰衣竹風下穆然濯微涼起行
西園中草木含幽香榴花開一枝桑棗沃以光鳴鳩得
美蔭困立志飛翔黃鳥亦自喜新音變圓吭杖藜觀物

化亦以觀我生萬物各得時我生日皇皇

小兒

小兒不識愁起坐牽我衣我欲嗔小兒老妻勸兒癡兒
癡君更甚不樂愁何為還坐愧此言洗盞當我前大勝
劉伶婦區區為酒錢

寄劉孝叔

君王有意誅驕虜椎破銅山鑄銅虎
聯翩三十七將軍走馬西來各開府
南山伐木作車軸東海取鼉漫戰鼓

汗流奔走誰敢後恐乏軍興汗質斧保甲連村團未遍
方田訟牒紛如雨爾來手實降新書決別根株窮脈縷
詔書惻怛信深厚吏能淺薄空勞苦平生學問止流俗
衆裏莛竿誰比數忽令獨奏鳳將雛倉卒欲吹那得譜
况復連年苦饑饉剝蓄草木啖泥土今年雨雪頗應時
又報蝗蟲生翅股憂來洗盞欲強醉寂寞虛齋臥空甌
公厨十日不生烟更望紅裙踏筵舞故人屢寄山中信
只有當歸無別語方將雀鼠偷太倉未肯衣冠挂神武

吳興丈人真得道平日立朝非小補自從四方冠蓋閑
歸作二浙湖山主高蹤已自雜漁釣大隱何曾棄簪組
去年相從殊未足問道已許談其粗逝將棄官往卒業
俗緣未盡那得覩公家只在雲溪上有白雲如白羽
應憐進退苦皇皇更把安心教初祖

孔長源挽詞二首

少年才氣冠當時晚節孤風益自奇君勝宜為夫子後
林宗不愧蔡邕碑南荒尚記誅元惡東越誰能事細兒

者舊如今幾人在為君無憾為時悲

小堰門頭柳繫船吳山堂上月侵筵潮聲夜半千巖響

詩句明朝萬口傳

長源自越過杭夜飲有美堂上聯句長源詩云天目遠隨雙鳳落海門遙

感雨潮趨一坐稱善

宣憶日斜庚子後忽驚歲在己辰年佳城一

閑無窮事南望題詩淚灑牋

寄呂穆仲寺丞

孤山寺下水侵門每到先看醉墨痕楚相未亡談笑是

中郎不見典型存

杭有伶人善學呂舉措酷似別後常令作之以為笑

君先去踏

塵埃陌我亦來尋
桑棗村回首西湖真一夢
灰心霜鬢更休論

余主簿母挽詞

閨庭蘭玉照鄉閭
自昔雖貧樂有餘
豈獨家人在中饋
却因麟趾識闕雎
雲輅忽已歸仙府
喬木依然擁舊廬
忍把還鄉千斛淚
一時灑向老萊裾

送趙寺丞寄陳海州

景疏樓上喚蛾眉
君到應先誦此詩
若見益公投轄飲

莫忘衝雪送君時

答陳述古二首

漫說山東第二州，棗林桑泊負春遊。
城西亦有紅千葉

人老簪花却自羞

小桃破萼未勝春，羅綺叢中第一人。
聞道使君歸去後

舞衫歌扇總生塵

陳有小妓
述古稱之

張安道樂全堂

列子御風殊不惡，猶被莊生譏數數。
步兵飲酒中散琴

於此得全非至樂樂全居士全於天維摩丈室空脩然
平生痛飲今不飲無琴不獨琴無絃我公天與英雄表
龍章鳳姿照魚鳥但令端委坐廟堂北狄西戎談笑了
如今老去苦思歸小字親書寄我詩試問樂全全底事
無全何處更相虧

張文裕挽詞

高才本出朝廷右能事空推德業餘每見便聞曹植句
至今傳寶魏華書濟南名士新凋喪劍外生祠已潔除

欲寄西風兩行淚依然喬木鄭公廬

懷西湖寄晁美叔同年

西湖天下景遊者無愚賢深淺隨所得誰能識其全嗟
我本狂直早為世所捐獨專山水樂付與寧非天三百
六十寺幽尋遂窮年所至得其妙心知口難傳至今清
夜夢耳目餘芳鮮君持使者節風采爍雲烟清流與碧
巖安肯為君妍胡不屏騎從暫借僧榻眠讀我壁間詩
清涼洗煩煎策杖無道路直造意所便應逢古漁父葦

間自延緣問道若有得買魚勿論錢

和梅戶曹會獵鐵溝

山西從古說三明誰信儒冠也捍城竿上鯨鯢猶未掩

近泉
數盜

草中狐兔不須驚東州趙叟飲無敵南國梅仙詩

有聲不向如皋閒射雉歸來何以得卿卿

是日惟梅
趙不射

祭常山回小獵

青蓋前頭點皂旗黃茅岡下出長圍弄風驕馬跑空立
趁兔蒼鷹掠地飛回望白雲生翠巘歸來紅葉滿征衣

聖朝若用西涼簿白羽猶能效一揮

和章七出守湖州二首

方丈仙人出渺茫高情猶愛水雲鄉功名誰使連三捷
身世何緣得兩忘早歲歸休心共在他年相見話偏長
只應未報君恩重清夢時時到玉堂

絳闕雲臺總有名應須極貴又長生鼎中龍虎黃金賤

松下龜蛇綠骨輕

君好爐火而餌茯苓

雲水未淪纓可濯弁峰初

見眼應明兩卮春酒真堪羨獨占人間分外榮

和張子野見寄三絕句

前生我已到杭州到處長如到舊遊更欲洞霄為隱吏

一菴閒地且相留

過舊遊

狂吟跌宕無風雅醉墨淋漓不整齊應為詩人一回顧

山僧未忍掃黃泥

見題壁

柏堂南畔竹如雲此閣何人是主人但遣先生披鶴氅

不須更畫樂天真

竹閣見憶

和蔣夔寄茶

我生百事常隨緣四方水陸無不便扁州渡江適吳越
三年飲食窮芳鮮金齏玉膾飯炊雪海螯江柱初脫泉
臨風飽食甘寢罷一甌花乳浮輕圓自從捨舟入東武
沃野便到桑麻川剪毛胡羊大如馬誰記鹿角腥盤筵
厨中烝粟埋飯甕大杓更取酸生涎柘羅銅碾棄不用
脂麻白土須盆研故人猶作舊眼看謂我好尚如當年
沙溪北苑强分別水脚一線爭誰先清詩兩幅寄千里
紫金百餅費萬錢吟哦烹噉兩奇絕只恐偷乞煩封纏

老妻稚子不知愛一半已入薑鹽煎人生所遇無不可
南北嗜好知誰賢死生禍福久不擇更論甘苦爭蚩妍
知君窮旅不自擇因詩寄謝聊相鐫

荅李邦直

美人如春風著物物未知羈愁似冰雪見子先流澌子
從徐方來吏民舉熙熙扶病出見之驚我一何衰知我
久慵倦起我以新詩詩詞如醇酒盎然熏四支徑飲不
覺醉欲和先昏疲西齋有蠻帳風雨夜紛披放懷語不

擇撫掌笑脫頤別來今幾何春物已含姿柳色日夜暗
子來竟何時徐方雖云樂東山禁遊嬉又無狂太守何
以解憂思聞子有賢婦華堂詠螽斯盍不倒囊索賣鮒
買蛾眉不用教絲竹唱我新歌詞

和文與可洋川園池三十首

湖橋

朱欄畫柱照湖明白葛烏紗曳履行橋下龜魚晚無數
識君拄杖過橋聲

橫湖

貪看翠蓋擁紅粧
不覺湖邊一夜霜
卷却天機雲錦段
從教匹練寫秋光

書軒

雨昏石硯寒雲色
風動牙籤亂葉聲
庭下已生書帶草
使君疑是鄭康成

冰池

不嫌冰雪遶池看
誰似詩人巧耐寒
記取羲之洗硯處

碧瑠璃下黑蛟螭

竹塢

晚節先生道轉孤
歲寒惟有竹相娛
麈尾杜牧真堪笑
喚作軍中十萬夫

荻浦

雨折霜乾不耐秋
白花黃葉使人愁
月明小艇湖邊宿
便是江南鸚鵡洲

蓼嶼

秋歸南浦。蟋蟀鳴霜落。橫湖沙水清。卧雨幽花無限思。
抱叢寒蝶。不勝情。

望雲樓

陰晴朝暮幾回新。已向虛空付此身。出本無心歸亦好。
白雲還似望雲人。

天漢臺

漾水東流舊見經。銀潢左界上通靈。此臺試向天文覓。
閣道中間第幾星。

待月臺

月與高人本有期
挂簷低戶映蛾眉
只從昨夜十分滿
漸覺冰輪出海遲

二樂榭

此間真趣豈容談
二樂并君已是三
仁智更煩訶妄見

坐令魯叟作瞿曇

來詩云二見因妄生

漢泉亭

聞道池亭勝兩川
應須爛醉蒼雲烟
勸君多種長腰米

消破亭中萬斛泉

吏隱亭

縱橫憂患滿人間
頗怪先生日日閒
昨夜清風眠北牖
朝來爽氣在西山

霜筠亭

解籜新篁不自持
嬋娟已有歲寒姿
要看凜凜霜前意
須待秋風粉落時

無言亭

慙慙稽首維摩詰敢問如何是法門彈指未終千偈了
向人還道本無言

露香亭

亭下佳人錦繡衣滿身瓔珞綴明璫晚香消歇無尋處
花已飄零露已晞

涵虛亭

水軒花榭兩爭妍秋月春風各自偏惟有此亭無一物
坐觀萬景得成全

溪光亭

決去湖波尚有情却隨初日動簷楹
溪光自古無人畫憑仗新詩與寫成

過溪亭

身輕步穩去忘歸四柱亭前野徇微
忽悟過溪還一笑水禽驚落翠毛衣

披錦亭

烟紅露綠曉風香燕舞鶯啼春日長
誰道使君貧且老

繡屏錦帳咽笙簧

楔亭

曲池流水細鱗鱗
高會傳觴似洛濱
紅粉翠蛾應不要
畫船來往勝於人

菡萏亭

日日移牀趁下風
清香不盡思何窮
若為化作龜千歲
巢向田田亂葉中

茶蘼洞

長憶故山寒食夜野荼蘼發暗香來分無素手簪羅髻

且折霜蕤浸玉醅

長憶故山一作半雨半晴

實籐谷

漢川修竹賤如蓬斤斧何曾赦籜龍料得清貧饒太守
渭濱千畝在胸中

寒蘆港

溶溶晴港漾春暉蘆筍生時柳絮飛還有江南風物否
桃花流水鱖魚肥

野人廬

少年辛苦事犁鋤
剛厭青山遶故居
老覺華堂無意味
却須時到野人廬

此君菴

寄語菴前抱節君
與君到處合相親
寫真雖是文夫子
我亦真堂作記人

金橙徑

金橙縱復里人知
不見鱸魚價自低
須是松江烟雨裏

小船燒薤擣香薷

南園

不種天桃與綠楊使君應欲候農桑
春畦雨過羅紈膩
夏隴風來餅餌香

北園

漢水巴山樂有餘一麾從此首歸塗
北園草木憑君問
許我他年作主無

寄題刁景純藏春塢

白首歸來種萬松待看千尺舞霜風年拋造物陶甄外
春在先生杖履中楊柳長齊低戶暗櫻桃爛熟滴堦紅
何時却與徐元直共訪襄陽龐德公

玉盤盂二首

并叙

東武舊俗每歲四月大會於南禪資福兩寺以芍藥供
佛而今歲最盛凡七千餘朵皆重跗累萼繁麗豐碩中
有白花正圓如覆盂其下十餘葉稍大承之如盤姿格
絕異獨出於七千朵之上云得之於城北蘇氏園中周

宰相菖公之別業也而其名俚甚乃為易之

雜花狼藉占春餘芍藥開時掃地無兩寺粧成寶纓絡
一枝爭看玉盤盂佳名會作新翻曲絕品難尋舊畫圖
從此定知年穀熟姑山親見雪肌膚

花不能言意可知令君痛飲更無疑但持白酒勸嘉客
直待瓊舟覆玉彝負郭相君初擇地看羊屬國首吟詩
吾家豈與花相厚更問殘芳有幾枝

和潞公超然臺收韻

我公厭富貴常苦勲業尋相期赤松子永望白雲岑清
風出談笑萬竅為號吟吟成超然詩洗我蓬之心嗟我
本何人麋鹿強冠襟身微空志大交淺屢言深囑公如
得謝呼我幸寄音但恐酒錢盡煩公揮索金

聞喬太博換左藏知欽州以詩招飲

今年果起故將軍幽夢清詩信有神馬革裹尸真細事
虎頭食肉更何人陣雲冷壓黃茆瘴羽扇斜揮白葛巾
痛飲從今有幾日西軒月色夜來新

喬將行烹鵝鹿出刀劒以飲客以詩戲之

破匣哀鳴出素虬倦看鵙鵙聽呦呦明朝只恐無烹鶴
此去還須却佩牛便可先呼報恩子不妨仍帶醉鄉侯
他年萬騎歸應好奈有移文在故丘

次韻劉貢父李公擇見寄二首

白髮相望兩故人眼看時事幾番新曲無和者應思郢

論少卑之且借秦歲惡詩人無好語

公擇來詩皆道吳中饑苦之事

夜

長鯨守向誰親

貢父近喪偶

少思多睡無如我鼻息雷鳴撼

四隣

何人勸我此間來，絃管生衣甌有埃。
綠蟻濡唇無百斛，蝗蟲撲面已三回。
磨刀入谷追窮寇，灑涕循城拾棄孩。
為郡鮮歡君莫歎，猶勝塵土走章臺。

寄黎眉州

膠西高處望西川，應在孤雲落照邊。
瓦屋寒堆春後雪，峨眉翠掃雨餘天。
治經方笑春秋學，好士今無六一賢。
君以春秋受知於歐陽文，忠公公自號六一居士。
且待淵明賦歸去，共將詩酒

赴流年

和趙郎中捕蝗見寄次韻

麥穗人許長穀苗牛可沒天公獨何意忍使蝗蟲發驅攘著令典農事安可忽我僕既胼胝我馬亦款矻飛騰漸云少筋力亦已竭苟無百篇詩何以醒睡兀初如疏畎澮漸若決澣渤往來供十吏腕脫不容歇平生輕妄庸熟視笑魏勃愛君有逸氣詩壇專斬伐民病何時休吏職不可越慎無及世事向空書咄咄

登常山絕頂廣麗亭

西望穆陵關東望琅邪臺南望九仙山北望空飛埃相
將叫虞舜遂欲歸蓬萊嗟我二三子狂飲亦荒哉紅裙
欲先去長笛有餘哀清歌入雲霄妙舞纖腰回自從有
此山白石封蒼苔何常有此樂將去復徘徊人生如朝
露白髮日夜催棄置當何言萬劫終飛灰

薄薄酒二首

并叙

膠西先生趙明叔家貧好飲不擇酒而醉常云薄薄酒

勝茶湯醜醜婦勝空房其言雖俚而近乎達故推而廣之以補東州之樂府既又以為未也復自和一篇聊以發覽者之一喙云耳

薄薄酒勝茶湯簾簾布勝無裳醜妻惡妾勝空房五更待漏靴滿霜不如三伏日高睡足北窓涼珠襦玉柙萬人相送歸北邙不如懸鶉百結獨坐負朝陽生前富貴死後文章百年瞬息萬世忙夷齊盜跖俱亡羊不如眼前一醉是非憂樂都兩忘

薄薄酒飲兩鍾簾簾布著兩重美惡雖異醉暖同醜妻
惡妾壽乃公隱居求志義之從本不計較東華塵土北
窓風百年雖長要有終富死未必輸生窮但恐珠玉留
君容千載不朽遭樊崇文章自足欺盲聾誰使一朝富
貴面發紅達人自達酒何功世間是非憂樂本來空

同年王中甫挽詞

先帝親收十五人四方爭看擊鵬鯤如君才業真堪用
顧我衰遲不足論出處陞沉十年後死生契濶幾人存

他時京口尋遺跡宿草猶應有淚痕

仁宗朝賢良十五人今惟富鄭公張

宣猷錢純老及余與舍弟在耳

七月五日二首

避謗詩尋醫畏病酒入務蕭條北窓下長日誰與度今年苦炎熱草木困薰煮況我早衰人幽居氣如縷秋來有佳興秫稻已含露還復此微吟往和糟牀注

何處覓新秋蕭然北臺上秋來未云幾風月已清亮雲間聳孤翠林表浮遠漲新棗漸堪剝晚瓜猶可餉西風

送落日萬竅含悽悵念當急行樂白髮不汝放

趙郎中見和戲復荅之

趙子吟詩如潑水一揮三百八十字奈何效我欲尋醫
恰似西施藏白地趙子飲酒如淋灰一年十萬八千杯
若不令君早入務飲竭東海生黃埃我衰臨政多繆錯
羨君精采如秋鶚頗哀老子今日飲為君坐嘯主畫諾

次韻周邠寄雁蕩山圖二首

指點先憑採藥翁丹青化出大槐宮眼明小閣浮烟翠

齒冷新詩嚼雪風二華行觀雄陝右九仙今已壓京東
將赴河中密過太華九仙在東武奇秀不減雁蕩也此生的有尋山分已覺溫台
落手中

西湖三載與君同馬入塵埃鶴入籠東海獨來看出日
石橋先去踏長虹遙知別後添華髮時向樽前說病翁
所恨蜀山君未見他年携手醉郾筒

送碧香酒與趙明叔教授

聞君有婦賢且廉勸君慎勿為楚相不羨紫駝分御食

自遣赤脚沽村釀嗟君老狂不知愧更吟醜婦惡嘲謗
諸生聞語定失笑冬暖號寒卧無帳碧香近出帝子家
鵝兒破殼酥流盎不學劉伶獨自飲一壺往助齊眉餉

趙既見和復次韻答之

長安小吏天所放日夜歌呼和丞相豈知後世有阿瞞

曹公自言
參之後

北海樽前提私釀先生未出禁酒國詩語孤

高常近謗幾回無酒欲沽君却畏有司書簿帳

近制公
使酒過

數法
甚重

酸寒可笑分一斗日飲已何足袁盎更將險語壓

衰翁只恐自是臺無餉

趙郎中往莒縣逾月而歸復以一壺遺之仍用

元韻

東隣主人遊不歸悲歌夜夜聞春相門前人鬬馬嘶急
一家喜氣如春釀王事何曾怨獨賢室人豈忍交謫謗
大兒踉蹌越門限小兒咿啞語繡帳定教舞袖掣伊涼
更想夜庖鳴甕盎題詩送酒君勿諠免使退之嘲一餉

蘇潛聖挽詞

妙齡馳譽百夫雄
晚節忘懷大隱中
悃悃無華真漢吏
文章爾雅稱吾宗
趨時肯負平生志
有子還應不死同
惟我閒思十年事
數行老淚寄西風

東坡全集卷七